

BASKETEBÓL

Federação Nacional de Basquete de Timor-Leste (FNBTL)
Afiliasaun – Fédération Internationale de Basketball (FIBA)

Dokumentu relevante sira hosi FIBA:

- Estatutu Jerál FIBA 2021 (FIBA General Statutes 2021)
- Regulamentu Interna FIBA (Livru 1) 2024 (FIBA Internal Regulations (Book 1) 2024)
- Polítika Salvaguarda FIBA 2022 (FIBA Safeguarding Policy 2022)

1. PADRUN NO REGRAS SIRA NE'EBÉ BANDU ASEDIU NO ABUZU SEKSUÁL

Tuir **FIBA nia Regulamentu Internu** (Livru 1), katak bandu makaas tebes asédiu iha forma hotu-hotu (Artigu 133). Artigu hanesan iha número *h* no *i* define abuzu no asédiu seksuál hanesan tuirmai:

“**Abuzu seksuál**” signifika konduta ho natureza seksuál, tantu la'ós ho kontaktu, ho kontaktu ka ho penetrasaun, iha ne'ebé konsentimentu hetan liuhosi koasaun/manipulasaun ka lafó konsentimentu ka labele fó konsentimentu.

“**Asédiu seksuál**” signifika hahalok ne'ebé la'ós ho hakarak no la husu ho natureza seksuál, tantu verbál, la'ós verbál, ka fíziku.

Aleinde ne'e, Estatutu Jerál FIBA nian afirma katak ida-ne'e konstitui FIBA nia knaar atu "formula ka adota no implementa polítika sira ne'ebé apropriadu iha relasaun ho diskriminasaun, asédiu seksuál, oportunidade hanesan, ekidade [...]" (Artigu 4.d).

Ikus liu, **FIBA nia Polítika Salvaguarda** mós bandu asédiu no abuzu seksuál, liuliu hasoru labarik sira, atleta joven sira no adultu sira ne'ebé vulneravel. Polítika ne'e define asédiu no abuzu seksuál hanesan tuirmai:

Asédiu: Hahalok ka konduta ne'ebé normalmente la'o hela no ne'ebé mak bele mós uza atu deskreve abuzu, insultu, ka asaun sira seluk ne'ebé hamosu prejuízu ba ema seluk iha baze regulár. Asédiu mak termu jerál ida ne'ebé uza hodi deskreve hahalok tortura oioin, no ida-ne'e bele mai ho natureza fíziku, emosionál, ka seksuál (p.3).

Abuzu seksuál: Kualkér hahalok ne'ebé rezulta iha esplorasau hasoru ema ida, ho sira-nia konsentimentu ka lae, ho objetivu atu hetan gratifikasaun seksuál ka erótiku. Abuzu seksuál bele komete hosi ema ida ne'ebé iha idade boot liu duké vítima ka intelektualmente, emosionalmente, fízikamente, ka seksualmente maduru liu vítima. Abuzu seksuál inklui atividade sira ne'ebé la'ós ho kontaktu, hanesan espozisaun indesente, envolve jogadór joven sira ka grupu vulneravel sira hodi sai testemuña ba aktu seksuál sira, haree ba imajen seksuál/pornografia, ka fó-hatais sira ho dí'ak hodi prepara ba abuzu (inklui liuhosi internet). Maski pesoál refere atinji ona idade legál ba

konsentimentu seksuál iha sira-nia jurisdisaun, maibé la aseitavel ba ema ida atu abuza sira-nia relasaun konfiansa nian hodi hetan gratifikasaun seksuál (pp. 4-5).

2. DEVÉR FEDERASAUN NASIONÁL NIAN

Federsaun Nasionál sira (FN) iha devér atu “kumpre, iha tempu hotu-hotu, ba Estatutu Jerál, Regulamentu Internu, regra no regulamentu sira seluk no mós desizaun sira hosi FIBA no hosi zona ne'ebé nia hetan atribuisaun” (númeru 7.a hosi Regulamentu Internu).

Regulamentu hotu-hotu ne'ebé aprova hosi FN sira tenke kumpre tomak ho FIBA nia Estatutu Jerál no Regulamentu Internu sira (Númeru 9.3 hosi Estatutu Jerál).

Federsaun Nasionál sira tenke uza FIBA nia Polítika Salvaguarda nu'udar matadalan ida atu estabese sira-nia polítika salvaguarda rasik (númeru 3.1.1 hosi Polítika Salvaguarda).

Federsaun Nasionál sira iha devér atu promove prosedimentu dixiplinár sira bainhira sira-nia atleta sira komete violasaun relasiona ho integridade, ne'ebé inklui asédiu no abuzu seksuál (Númeru 159 hosi Regulamentu Internu).

Federsaun Nasionál sira tenke dezenvolve no implementa regulamentu, polítika ka prosedimentu sira atu salvaguarda no proteje ema sira hosi asédiu no abuzu seksuál. Regulamentu ka polítika sira-ne'e tenke kumpre rekizitu mínimu sira tuirmai:

- asegura katak regulamentu sira-ne'e halo tuir FIBA nia dispozisaun kona-ba Salvaguarda nian;
- asegura katak ema hotu ne'ebé nu'udar partisipante iha kompetisaun sira Federsaun Nasionál Membru nian ne'e hatene no kumpre regra sira ne'ebé prevee ona;

FN mos iha dever atu:

- fó-hatene ba FIBA kona-ba sansaun dixiplinár ruma ne'ebé impoin relasiona ho insidente ne'ebé akontese ona ne'ebé viola FIBA nia regulamentu internu sira ka regulamentu sira ho natureza hanesan ne'ebé mak adota hosi membru (númeru 159 hosi Regulamentu Internu);
- investiga no promove responsabilidade ba kualkér eventuál violasaun ba dispozisaun sira relativa ho dispozisaun sira kona-ba integridade hosi FIBA nia regulamentu internu (númeru 160 hosi Regulamentu Internu sira).

Se karik, tuir FIBA nia haree, membru nasionál ida (ka FN ida) la konsege investiga apropiadamente ba violasaun potenciál ruma relasiona ho kestaun sira integridade nian, FIBA bele hala'o nia investigasaun rasik no/ka foti desizaun ida.

Se karik FIBA tenke atua hodi asumi ka kaer prosedimentu hodi garante investigasaun no responsabilidade hosi alegadu infratór tanba fallansu hosi parte FN nian atu foti asaun, FIBA bele decide atu halo FN responsabiliza ba kustu ruma ne'ebé asociadu ho

prosedimentu sira ne'ebé implementa hosi FIBA. (númeru 160 hosi Regulamentu Internu).

Fallansu atu atua hodi investiga keixa sira kona-ba asédiu ka abuzu seksuál nian ne'e nu'udar violasaun ida hasoru regulamentu internu no FN bele responsabiliza perante FIBA.

3. KONSEKUÉNSIA BA VIOLASAUN

FNBTL sujeita ba jurisdisaun FIBA nian, tuir númeru 89.b hosi Regulamentu Internu.

Kualkér alegadu insidente kona-ba asédiu ka abuzu seksuál nian bele fó orijen ba instaurasaun prosesu dixiplinár nian.

Sansaun sira

Bele fó sansaun sira tuirmai ba entidade legál sira (porezemplu FNBTL) (númeru 172 Regulamentu Internu):

- i. adverténsia;
- ii. reprensaun;
- iii. multa ho valór to'o chf 300,000;
- iv. bandu atu fa'an billete ba adeptu sira relasiona ho jogu sira iha rai-li'ur;
- v. anulasaun ba rezultadu hosi jogu ofisiál ida nian;
- vi. ordena atu repete fali jogu ofisiál ida;
- vii. dedusaun ba pontu sira;
- viii. ordena atu kansela jogu ofisiál ida;
- ix. hala'o jogu ofisiál ida lahó espetadór ka odamatan taka;
- x. taka tomak ka parsiál ba fatin jogu nian;
- xi. hala'o jogu ofisiál ida iha sidade ka nasaun terseira;
- xii. retensaun ba benefísiu finanseiru nian sira;
- xiii. bandu atu rejista jogadór foun sira;
- xiv. deskualifikasaun hosi kompetisaun ne'ebé la'o hela no/ka eskluzaun hosi kompetisaun (sira) iha futuru;
- xv. retirada ba título ka prémiu;
- xvi. retirada ba lisensa ka rejistu;
- xvii. servisu ne'ebé fó benefísiu ba comunidade basketeból;
- xviii. reembolsu ba despeza sira no/ka danu sira ne'ebé inkorre ba fiba no federasaun nasionál membru (sira) ne'ebé afetadu nu'udar rezultadu direta ida hosi violasaun refere; no
- xix. kombinasau ida hosi medida sira mak temi ona iha leten.

Sansaun sira tuirmai ne'e bele impoin ba ema naturál sira ba infrasaun dixiplinár (porezemplu indivíduu sira, hanesan treinadór, membru sira hosi Federasaun Nasionál no mós atleta sira): (númeru 173 hosi Regulamentu Internu):

- i. Adverténsia;
- ii. Reprensaun;

- iii. Multa ho valór to'o CHF 100,000;
- iv. Suspensaun hosi númeru espesífiku ida hosi jogu ofisiál sira ka ba períodu tempu ida espesífiku;
- v. Suspensaun atu hala'ó funsaun ida ba númeru espesífiku ida hosi jogu ofisiál sira ka ba períodu tempu ida espesífiku;
- vi. Suspensaun ka hasai hosi kargu;
- vii. Bandu atu partisipa iha FIBA no FIBA nia atividade sira ruma ka hotu-hotu;
- viii. retirada ba título ka prémio;
- ix. servisu ne'ebé fó benefísiu ba comunidade basketeból;
- x. Kombinasau ida hosi medida sira mak temi ona iha leten.

KONKLUZAUN
<ul style="list-style-type: none"> • FIBA estabelese klaramente ona nu'udar regra báziku hodi bandu asédiu seksuál no abuzu seksuál iha modalidade desportu basketeból nia laran; • FIBA ezije ba Federasaun Nasionál hotu-hotu atu iha kapasidade hodi hala'ó prosesu dixiplinár ne'ebé efektivu bainhira sira-nia membru sira komete asédiu seksuál ka abuzu seksuál (ka viola regra sira seluk ne'ebé determina hosi FIBA); • FIBA sei foti asaun dixiplinár direta hasoru atleta/staf nasionál sira bainhira FNBTTL rasik la halo asaun; • FNBTTL bele responsabiliza perante FIBA bainhira nia la investiga no la implementa didi'ak prosedimentu dixiplinár sira relasiona ho violasaun potenciál sira, inklui asédiu no abuzu seksuál.

Dokumentu ida-ne'e rezumu badak ida ne'ebé hakerek husi JU,S Jurídico Social kona-ba aspetu prinsipál regra internasionál nian ne'ebé aplika ba federasaun desportu Timor-Leste bazeia ba afiliasaun atuál ba órgaun governasaun desportu internasionál sira (ka iha prosesu atu sai afiliadu).

Dokumentu ida-ne'e halo rezumu ba pozisaun atuál federasaun internasionál nian relasiona ho bandu ba asédiu no abuzu seksuál, no identifika devér espesífiku relevante sira ne'ebé impoin ba federasaun nasionál sira iha área ida-ne'e. Ida-ne'e mós hodi identifika se órgaun governasaun internasionál relevante bele intervein diretamente iha alegasaun sira kona-ba violasaun ba regra konduta ne'ebé bandu asaun sira ho natureza seksuál ne'ebé akontese iha âmbito federasaun nasionál nian, enkuantu identifika mós sansaun potenciál sira ba indivíduu ne'ebé komete ona asédiu ka abuzu seksuál no/ka ba Federasaun Nasionál bainhira nia viola ninia devér sira ne'ebé mak impoin hosi instrumentu regulatóriu internu sira.

Sumáriu la iha apresentasaun kompletu ida kona-ba regra sira hotu, no rekomenda ba Federasaun Nasionál sira atu konsulta nafatin regra orijinal sira atu nune'e bele hetan informasaun kompletu ida kona-ba tópiku ne'e.